

Paulus mo surat

Tesalonikak de Kristen zi hip

1 Suratna an kitak de Tesalonikak de Kristen zi hip,
Bian Alap ne Teipsin Zini Yesus Kristus nik mo
bi eibiridan wenya kip,
Paulus, Silas, hen Timotius mae onakon:
Dawem! Diki Alap Zën sa kwasang-kwasang zemka mamkam
ebe mae hap gol gwizimdi. Hen nen zëno taha terenak esa
lowehe gwer.

**Mae hap de ol: Tesalonikak de zini
dawemkam ëKristen gwëk.**

2-3 Aya wal oso wal, ëe hen-henkam ebon mae onakonë
dawemna Bian Alap hap olbla tine gwenan. Eno mae mo
bosem-sesa de gubin nibanë etan-etankam anakan en sone
gweblanan,

“Bian, ëe dawemsa ebe hap ol gwebla'an, sap
Tesalonikak de zini zëre mae mo Bian Yesussu de
taibliblansa dawemkam aha zi hip noltrei gwizim'in,
hen zëno mae mo kwasangna mes aha zisi de mas
gwibirida gwenkam wet sozimk. Hen zen Kristus de
lwahal zannak dep dawemkam kara në gwebla'an, in
zëp tatem ëzauk gwe'an.”

In zëbë kirekam nëre mae mo Bian hap dawemna ebon mae
onakon ol gweblanan.

⁴ Aya wal oso wal, ëe orep mesë anakan dam ulsuk, “Alap
man emsa kwasang gwibiridaka, in zëp hëndep emsa hlil inki.”

⁵ Sap ëe kimë ol dawemkam emsa tawa la gwibik, em mese
dekan anakan dam ulsuk, “An totore olsa hom. An Alap mo ol,
sosen tanganna.”^a Dekam zëp hen Alap mo Enhona ebon mae
ing gwe heka, in zëp ola in eno mae mo enhonak dawemkam
saltik. Ena hen tawana: Eë men kirekamë ebon mae onak aenaka
ërak makan kang ul gwekye. ⁶ Zëp em dekan zebe Bian Yesus

^a1:5 1Kor 2:4-5

mo ërak san, hen ano mae mo ërakna in san ang tak. Em hen aha zi hip ere mae mo Alapsa de taïblißlanna ema oltrei gwizimk. Zao zep hen emsa Desa de taïblißlan srëm wenyik sërkam karek da gwibik. Sap man ki emsa neibirida gwek, hwëna em home dekam Yesussu de ang gweblan hap baes tak. Sap Alap mo Enhona man ebon mae isrip-srina ing gul sone gwizimki, zebe ola insa dawemkam urensik gwek.^b ⁷ In zep Makedonia hen Akaya mo langnak de Kristen zini ebon mae onakon anakan hla nul gwek, “Kristen zini diki kirekam zëre mae mo eini noltrei gwizimnin.” ⁸ Bian Yesus onakore ol dawemna insa dekam zep ebon mae onakon Makedonia hen Akaya san dep nolteisik. Hwëna desan en hom. Tingare zi-ë zi-ë san eno mae mo Alapsa de taïblißlanna insa mes nolteisik. Zep ëe etan enda kore zisi asa anakan gubiridal? – “Zen mes dawemkam ëKristen gwek.” ⁹ Sap ëe kimë desa olëtowe gwenan, zen man kitak asa anakan aïsïl neibirida gwenan, “Tesalonikak de zini dawemkam emsa dokwa-kwak nuk. Zëre mae mo ensasa srëm dowal yang tabinni dekam zep hli nulidak. Dekam zep hwëna Ngaya Zini eiwa de Alapsa betek nëblak.” ¹⁰ Zen man hen asa nenbirida gwenan, “Tesalonikak de zini dawemkam Yesussu lwahal zannak dep kara në gweblanan.”

In eiwa, aya wal oso wal, sap Alap eiwa tin nikon Tane zemka ngaya taka, zep Zen eiwa ngatan zi mo lang nakon sa nësa kwang guluda ine hala– nen de Alap mo jalsa okamana awe hlaun srëm hap. Sap Alap mo jal de okamanak hatan hap dena man tangan golek de gwe'an.

**Mae hap de ol: Paulus mae kim Tesalonikak de lowehe
gwenak ërak makan zënaka kang nul gwekke.**

2 Aya wal oso wal, ena tawana: Ëe waba hap homë ebon mae yaïng gwek. ² Ena tawana: Ëe kimë nonol Pilipik yaïng gwek, zen man tangan asa karek da gwibik hen lamang da gwibik. Eno mae mo ënak hen man sap asa jalse neibirida gwek. Sap eiwa kirekam, hwëna nëre mae mo Alap abe mae hap enlala tatetena zer gwizimki. In zebë udobe naban Alap onakore ëngaya gwen hap de ol dawemna inkam emsa lonbirida gwek.^c ³ Zep ëe emsa de yasik tabin hip homë yaïng

^b 1:6 Kis 17:5-10 ^c 2:2 Kis 16:19-24, 17:1-9

gwezak. Aha enlala aning tan naban homë yaïng gwezak–
 boton olsa de tawa ta gwibin hip. ⁴ Hwëna ëe an Alap mo
 taïblibiridan zië yaïng gwezak– ëngaya gwen hap de ol
 dawemsa de ebe mae hap ayang gul gwizimdin hip. Sap ëe zi
 de asa sam gwesibiridan hap homë syal ta gwenan. Hwëna
 Alap, men Zen zi mo enhona karatda ta gwibir-zimnira, Zen
 en de asa sam gwesibirida gwen habë syal ta gwenan.^d

⁵ Ena tawana, hen Alap mo nwenakë emsa gubirida'an: Ëe
 are mae mo timsi de ngalap gwibin hip de enlala naban homë
 yaïng gwezak. Ëe u siwen enlala naban homë emsa anakan
 bën-jana la gwibik, “Ano tawa tabinkim mese ëei gwer, zep
 angkam kire-kiresa em ap kap tazimdin.”^e ⁶ Ëe ebon mae onak
 are mae mo bose dikim mam gwen hap homë syal ta gwek–
 sap eno mae mo nwenak, ahaksa aha zi mo nwenak.

Ëe an sap Kristus mo dam tasibin zi, zep sap amaka dekam
 emsa abe mae hap de ba maesa kap ta gwizimdin hip abe la
 gwibik. Ëe hwëna homë. ⁷ Ëe hwëna ol dawemna inkamë
 dawem enkam emsa laizi gwibik– men kirekam an wal zem
 walas zemka momkam daizi gwibirinke. ⁸ Ëe sap Alap onakore
 ol dawem enkam de emsa tawa ta gwibin hibë yaïng gwezak.
 Hwëna ama tangan emsa kwasang eibirida gwek, hëndep zebë
 emsa de mas gwibiridan hap are mae mo timni isrip-sri naban
 sosok la gwibik.^f ⁹ Aya-wal oso-wal, ena tawana: Ano mae mo
 danna te-ala hap de syalak zep hen ësin gwe-gwek– sap
 yaklam, sap kam. Ëe mae habë are mae mo syala insa ol gwek:
 Dekam de Alap onakore ol dawemna insa totoresa ebe mae hap
 gol gwizimdin hip, emsa de dohon-hon ta gwibin srëmkam.

¹⁰ Nglinak de gwë gwen Zini Alap mo nwenakë emsa
 gubirida'an– ena men kirekame asa kara la gwibikke: Ëe ebon
 mae onak enlala lalakkamë hen dam-dam enkamë lowehe
 gwek– enho kles gwešin srëmkam. ¹¹ Sap em tawana: Ëe bi
 zik de walas zemka alp gwibiridan mo kimë emsa olëlowehe
 gwek. ¹² Ëe zebë aha-en aha-enkam ebe mae hap ol zim-zimni
 ol gwizimk. Em kime karekna oltowe gwek, ëeyë hwëna eno
 mae mo enlalana tatete la gwizimk. Hen eno mae mo lowehen

^d2:4 Gal 1:10 ^e2:5 Kis 20:33-35 ^f2:8 Yoh 10:11

dikim Alap mo nwenak dakastin hip ama emsa titi la gwibik. Sap Alap Zena man emsa zere mo irik ginnik dikim biti gwen hap kwang guluda'ara– hen zere mo serkam de ngatannak dikim lowehe gwen hap.

¹³ Ee hen ama ebon mae onakon Alap hap dawemna mae hap olbla tine gwenan: Sap em kime abon mae onak Alap mo ola esane gwe-gwek, em dekam zebe hendep anakare enlala naban kyang-kyang ulsuk, “An eiwa Alap zere mo ol. Auhu-kama zi mo olsa hom.”^g Sap em mese ola insa kirekam laiblibik, in zep ola in eno mae mo enhonak syal gwe-gwenan. ¹⁴ In zep, aya-wal oso-wal, em Yahudi mo langnak de Kristen zi mo kim lowehék. In kim ahakore Yahudi eKristen gwek, hwena Yahudi bose zem dekam man karek da gwibik. Emsa in zep hen kirekam karek da gwibi'in– ere korena men zen eei gwe srém gwe'anye. ¹⁵⁻¹⁶ Sap Yahudi zini, zen kirekam egwe gwenan. Zen orep Alap mo olsa de ayang gul gwen hap de zini man damera gwek, hendep Yesussu dak, dekam zep hen asa neralsa sone gwibik. Zen zep hen asa angkam anakan tru-tru nul gwizimnin, “Em bahem Yahudi srém zini ola inkam tawa ta gwibin.” Zep zen in man enwe-mase gwe'an– tingare zi mo jal zi. Sap zen engaya gwen hap de ol dawemna insa man tru-tru nul gwizimnin.^h Zen dekam zep zere mae hap de karekna bwang nulsukse gwenan, hendep angkam Alap de heip gun hup dena mes tangan golek de tabir.

**Mae hap de ol: Paulus man tangan Tesalonikak de Kristen
zi niban de etan golétowen hap dwam gwe-gweka.**

¹⁷⁻¹⁸ Aya wal oso wal, nen ein tangane esyawek, zep ano mae mo enlalana nama ebon mae onak lwa gwe'ara. Ee ama eis gwibi'in, “Ano mae mo waslasna angkam kwasap waslas mo kim lowehe gwe'an.” In zebé sap etan-etankam emsa de duwebiridazan hap eakasik gwek. Hwena dowal mo kigi asa tru-tru gul gwizimki. Ee an Paulus, ee ama sap etan-etankam emsa de duwebiridazan hap akasik gwek, hendep zebé aumwa

^g**2:13** Gal 1:11-12

^h**2:15-16** Kis 2:23, 9:23-29, 13:45-50, 14:2-5, 14:19, 17:5, 17:13, 18:12

hap Timotiussu emsa de amjanbin hip zer sonek. ¹⁹ Sap em in zen tangan– ano mae mo isrip-sri gwibiridan wenyaye. Nöno mae mo Teipsönni Yesus in kim de lwa ha'an zaka, ëe dekam asa emsa isrip-sri naban zëbe hap anakan olëtrëblal, “An zen– ano mae mo syal gwibinkim de Emsa taïblïblan wenyaye!” Ëe zep asa hwëna Yesus onak aïlya gwibinni hla kul. ^{i 20} Zep em in ano mae mo aïlya gwibin wenya hen isrip-sri gwibiridan wenya zen tangan.

3 ¹⁻² Aumwa hap ëe anakanë ëenlala gwek, “Ëe banakan asa ëgwër– Tesalonikasa de amjanbin srëmkamye?” Dekam zebë ola anakan aha-en uk, “Timotius em neik song gwe. Ëe Silas han ëna Atenak asa ër.” Dekam zep hëndep nëre mae mo osona in emsa amjanbir zika. Zen hen Alap mo nganak de syal gwe-gwen zi– Kristus hup de ol dawemsa de gol halada gwen hap dena. Ëe mae habë ër sonek– zen de emsa Yesussu de taïblïblannak de tatem ëzauk gwen hap dena kim titi ta gwibin hip. ³ Ëe mae habë emsa ngalap eibirida'ak, “Yesussu de taïblïblan nakon mana etan lwanda halank, sap nësa man angkam karek da gwibi'in.” Ena tawana: Nësa de kirekam karek ta gwibin hip dena mes ki Alap mo kalang gwe gunnuk lwak. ^{j 4} Sap men kime apdekam lowehe gwek, ëe hen mesë dekam kirekam emsa enbirida gwek, “Nësa sa karek da gwibir.” Hen ena tawana: Zen mes ki hëndep kirekam lwak. ⁵ Zep ëe Paulus, ëe homë enlala nakon emsa sëwe hebirida gwek, zen in zebë hëndep Timotiussu ebon mae osan dep zer sonek– dekam de emsa tawa gwibiridan hap, “San ha nama Kristussu de taïblïblannak tatem ëzau'un?” Ëe ama emsa anakan ngalap gwibiridak, “Men zen nësa golëliwenda gwenda, san ha zen mes sap de ora san dep sil tibir halka? Ki ëe waba habë dan-sin niban syal eibirida gwek.”

**Mae hap de ol: Timotius kim etan Tesalonikak
de zi hip dena tonzim zikake.**

⁶ Hwëna Timotius mes nër hom ebon mae onakon lwahal zaka, hen zen mes ebe mae hap de ola isrip-sri gwibin tangan naka asa anakan tonzim zika, “Zen nama Yesussu de taïblïblannak tatem ëzauk gwe'an, hen zënaka man kwasang neibirida gwenan. Hen zen nama nësa zolan-zolan neibirida

ⁱ2:19 Plp 2:16, 4:1, 2Kor 1:14 ^j3:3 2Tim 3:12, Kis 14:22

gwenan, hen nësa de etan golëtowen hap enlwan neibirida gwenan– nen men kirekame hen desa de hlauludan hap ëenlwan gwe-gwenanke.” ⁷ In zep, aya-wal oso-wal, ëe kimë kirekam Silas han sane ëk, ëe dekam zebë enlalana oto eisik. Zep angkam ëe sap asa karekna oltowe gwer, hen zini sap sa asa karek da gwibir. Hwëna em de nama Yesussu de taïbli-blannak tatem ëzauk gwenkam, ëe ama tangan ësam gwesin. ⁸ Zep angkam enlala nakon mesë tangan ësäweher, sap em namae Bian Jesus onak tatem ëzau'un. ⁹ Zep ëe kimë Alapsa en sone gweblanan, isrip-srina ebon mae onakon zebë sërkam eis gwibirin. Eë zebë Alapsa isrip-sri ëbla tine gwenan. ¹⁰ Zebë hen enlala zon tasiblin naban kam denaban yaklam denaban abe la tine gwenan– dekam de eban mae etan golëtowen hap, hen dekam de etan emsa dawem enkam Yesussu dikim taïbli-blann hap denakim titi ta gwibin hip.

**Paulus kim Tesalonikak de Kristen
zi hip Alapsa abe takake:**

¹¹ Diki Eirzi-Bia Zën sa orana abe mae hap kles yasizimdi– emsa dikim amjanbiridan hap denaye. Eë zebë anakan Biansa abe la tine gwenan,

¹² “Bian men kirekam Ena Tesalonikak de zi hip de kwasangna ano mae mo enhonak dohonse gul gwizimki, Emki kirekam etan zëno mae mo enhonak syal gwe-gwen– zen dekakim zënaka dawemkam kwasang neibirida gwek, hen ëKristen srëm zi hip dekakim hen kwasangsa noltrei gwizimk. ¹³ Bian, zëno mae mo enhosa emki tatete ta gwizimdin– zen dekakim enlala kles gwesin srëmkam hen enholalakkam lowehe gwek, hen zen dekakim ano mae mo Teipsinnë Yesussu dawemkam nërtowek, Zen de ngatan zi mo lang nakon zëwe de wanya ban golëlwana dahal zannak.”

Kristen zi de kirekam lowehe gwen hap de ol:

4 Aya-wal oso-wal, ëe Kristen zi dikim Alap mo nwenak ësam gwesin hip dena mesë emsa tawa la gwibik, hëndep em mese desan ang tak. In zebë etan Teipsin Zini Jesus mo bosekam emsa titi labi'in– em dikim kire syalsa etan esek gulse gwen hap. ² Sap Kristen zi mo kirekam de lowehen hap de ola

mensaë Bian Yesus mo bosekam ayang ul gwizimk, ena namae desa enlala ei gwibi'in. ³ Zep Alap mo ebe mae hap de dwam gwibinni, zen em dikim enho lalak enkam lowehe gwen hap, hen ëkahalo gwe-gwensa dikim baes tan hap. ⁴ In zep zikim dena, em ere mae mo wanga tëbolena enho lalakkam olëinik gwe-gwek, aha zi mo bi gwibin nika ekakim nwe enkam hla kulsuk gwek.^k ⁵ Bahem ere mae mo hole-hle san ang ta gwen–men kirekam Alapsa de tame tan srëm zini ëgwë gwenanye. ⁶ Zi bose uk mo dobe jopnak bahem ake anen, hen bahem ap son.^l Kire zini Bian sa kareknak kang gulu–men kirekamë hamal hap emsa enbirida gwekke. ⁷ Sap Alap hom nësa anakan gubiridaka, “Em kahalo sosenkam lowehe gwek.” Zen diki enho lalak enkam de lowehe gwen hap nësa gubiridaka.^m ⁸ Ëe ansa emsa tawa labi'in, zen are mae mo olsa hom. Zep men zen de ola ansa baes neibi'ik, ki zen mes Alap, men Zen zëre mo Enhona zer gwizimnira, zëno ola baes gwibirida.

⁹ Angkam ëe sap Kristen bose wal omka dikim kwasang gwibirida gwen hap denaka amaka ale ulzim'in, hwëna Alap Zën mes ki kire hap dena ebe mae hap golzimki. ¹⁰ Ere mae mo kwasangna mese ki oltrei gwizimk–tingare langna Makedoniak de ere mae mo Kristen bose wal hap. Hwëna aya-wal oso-wal, ëe ama emsa titi labi'in–em de ere mae mo kwasangna insa etan esek gul kinï gwen hap.

¹¹ Emki ëalp gwe-gwen–enlala sësekkam de lowehe gwen hap. Aha zi mo syalak bahem enaka golëngewenda gwen. Hwëna diki e-en em ere mae mo syalsa gol gwen–men kirekamë emsa enbirida gwekke.ⁿ ¹² Dekam Kristen zini nëno mae mo bosena sa aha zi mo nwenak dawem gwer, hen nen dekam aha zisi molye blol eibirida gwek.

^k4:4 Yunani olkam wanga tëbole hap dena “botol”kam ale nuk. Yunani olkam zen kirekam nolzabe gwek–in kirekam hen Orya olkam wanga tëbolekam olzabe gwenanke. Hwëna Yunani olkam aha dam gulsunnu hen ki. Zen a kirekam moye: Em dawemkam we walya ban de enho lalakkam ën hap denaka tame uk–dekam de aha zi mo bi gwibin nika nwe enkam hlalsuk gwen hap. (1Kor 6:12-20)

^l4:6 Paulus mae mo langnak dobe jopna hom, hwëna Orya ol zini kirekam gulk sun ola nablon gwenan–anakare hap, “Wal bose omka bahem we walya kon yane-ne tan.”

^m4:7 1Ptr 1:15-16 ⁿ4:11 2Tes 3:10-12

Bian Yesus de etan lwa halzan hap de ol:

¹³ Aya wal oso wal, ëe homë em de anakan tame gun srëm hap ëdwam gwe'an, "ËKristen gwen wenya men zen juwenkam ëteingir gwe guk, zen banakan sa ëgwër?" Sap ëKristen gwen srëm wenya, zen iye zik de tinkim karekkam hala-hla neibirida gwenan, sap zen hom Yesussu enlalana anakan zon dasik gweblanan, "Zen sa desa ngaya tala." Hwëna ëe homë ki ëdwam gwe'an– em de hen kirekam ëgwë gwen hapye. ¹⁴ Sap nen mese anakan ëtaïblïk, "Yesus sap mes tilki, hwëna man etan ngaya gweka." In zep nen hen anakan ëtaïbli'an, "Yesussu de taïbli'blan wenya men zen juwenkam ëteingir gwe guk, Yesus kim de etan lwa ha'an zaka, Alap sa desa Yesus onak dep tagal gulsulu." ¹⁵ Ëe in zebë Bian Yesus mo ola, etan de nësa tagal gulsuzun hap dena, ebe mae hap ayang gulzim'in: Yesus de etan lwahal zankam, nen an zen nama ngaya wenya lowe he'an, nen bëjen nen juwenkam de teingir gwe gun wenya insa ngatan zi mo lang san de sesek gwe senkam ngip guludan. ¹⁶ Dekam Alap mo dam taha nakore zi mo teipsin nik sa ol mamkam takenbirida zala, ki esa ngatan zi mo lang nakore sramin aukuna ësane gwer. Zen dekam sa nëno mae mo Teipsinni Yesus Zëna butnak dep ati gwe ine zala. Desa de taïbli'blan wenya men zen juwek, zen dekam sa nonol tim ëse naban luk tal. ¹⁷ Ki sa hwëna apdekam ngaya wenya nëban mae ngli san dep lup gul ane hala– dekam de zë zëre han zertowehan hapye.^o Zen dekam sa zë hëndep denaban nësa golëlowehe gwer. ¹⁸ Zen in zep, emki kirekam enlalana enaka së ta sone gwizimdin.

5 ¹⁻² Aya wal oso wal, em mese sap Bian mo hatan hap de yaklana anakan ëtawa gwek, "Zen kam de sowë zi mo kim sa nëp lwazim." ^p Zep ëe bëjenë emsa anakan gubiridan, "Yaklana dekam sa hata zala." ³ Zëno hatan hap denak kim de golek de gwe'ak, dekam zini sa ëkil gïl gwer, "Langna an aïris ki lwa gwe'an– umlae enkam." Hwëna zen kirenak sa mumuk ennak Alap mo langsa de karek gun hup dena hatal– men kiye, u nubare we de mumuk ennak zënaka eisbir anenna. Dekam

^o 4:17 1Kor 15:51-52 ^p 5:1-2 Luk 17:24-32, 21:34-36, 2Ptr 3:10

men zen Yesussu daïblïbla srëm gwek, zen toton ba san molya äasendak.

⁴ Hwëna aya wal oso wal, em kawesinnik home lowe he'an. Zep Bian de sowë zi mo kim hata zannak, em molye auna ohloblak. ⁵ Sap em kawesinnik de zisi hom. Em kitak ngatannak de zi. Nen hleng gwen srëmnak de zisi hom. Nen litinnik de zi. ⁶ Zep nen bap nen ni enna truwenda gwen– men kirekam aha zi truwenda gwenanye. Nen hwëna ënwe-alk gwen srëmkam nen lowehe gwen– kawesinnik de enlala nik ëmamak gwen srëmkam. ⁷ Sap kam zen dekam zini nini truwe gwenan, hen ho mamakna dekam notdeblanda gwenan, dekam zep ëmamak gwe-gwenan. ⁸ Hwëna nen litinnik de zi, zep nen mamak srëmkam nen lowehe gwen. Nen dowal mo kigi nabane ëreija gwenan, zep eijan hap nen nënaka wër tyasibin. Nonol tanganna Yesussu de taïblïblanna kwasang-kwasang naban desa biti makan nen darak tan. Enlala zon tasik gweblanna desa mire sigi makan nen anakare enlala naban alala tan, “Zen sa eiwa nësa ngaya tabiri.” Dekam dowal mo kigi mo gwetapna sa nëbon mae ëjawe guk hana gwer. ⁹ ⁹ Sap Alap hom nësa anakan golëguku, “Dikire ëtimbwas gwek.” Hwëna nësa mes gubiridaka, “Dikire Bian Yesus Kristus hun de zeraha-en gwenkam ëngaya gwek.” ¹⁰ Sap Yesus Zen mae hap tilki: Nen dikim apdenak zergwë gwen hap– sap nama de ngaya wenya, hen men zen ngatan zi mo lang san dep ëdane gukke. ¹¹ Zen in zep, kirekam de ol zim-zimkim em enaka tatete ta gwibin– men kirekam angkam enaka oto lasik gwibi'inke.

Aumwa hap de ol zim-zim:

¹² Aya wal oso wal, ëe ama emsa enbirida'an: Men zen eno mae mo ngirinnik Bian mo syala nol gwenan, emki blikip gwesibirida gwen– hen men zen emsa Alap mo olkam titi da gwibirinye. ¹³ ^r ¹³ Dawem enkam blikip eisibirida gwek, hen kwasangsa em gol gwizimdin, sap zen dan syal-syala ban emsa alp neibirida tine gwenan.

Aya wal oso wal, umlae enkam lowehe gwek. ¹⁴ Men zen ë-enna nyauk gweblanan, desa emki anakan titi ta gwibin, “Emki hen syalak mas ta gwen. Bahem aha zi ensa blol gwibirida gwen.”

Men zen Kristus hup denaka de golluwen hap ëtïtik gwe-gwe'an, emki zëbe mae hap udobe naban dikim golluwe gwen hap de ol zïm-zïmsi gol gwizimdin.

Men zen Yesussu de taïblißlannak ëtatete gwe srëm gwe'an, desa emki tatete ta gwibin. Sosonkam bahem tïti ta gwibin, hwëna sam-samkam em mas gwibirida gwen.

¹⁵ Wal bose wal oban bahem hwë-hwëkam enaka karek ta gwibin. Diki dawemsa emki hwë-hwëkam ere mae hap gol gwizimdin– nonol tanganna ere mo Kristen bose wal hap.

¹⁶ Emki ëisrip-sri gwe tine gwen.^s ¹⁷ Alapsa hen-henkan em sonebla tine gwek. ¹⁸ Banakare maekam de lowehen nakon Alap hap dawemsa olbla tine gwek. Sap zëno dwam gwibinni zen kirekam– Kristus mo bi gwibiridan zini nëbe mae hap denaye.

¹⁹ Alap mensa zëre mo Enhona nëno mae mo enhonak ing ta soneka bahem tïn tïsin.^t ²⁰ Zep zëre mo Enhona mensa hamal hap de ola zinik ing gul sone gwizimnira, zen kim desa ayang nulzimnira gwenan, desa de ësane gwenkam em bahem hwaulsuk gwen.^u ²¹ Hwëna kitak de ol ayang gunnu insa, emki anakan akasik gwibin, “San ha eiwa Alap onakorena? San ha dekore naka hom?” Dawem san dep de tïti tabinni, desan amki ang ta gwek.^v ²² Tïngare karekna em aes gwesik gwibin.

²³ Dikire Alap, men Zen tahana nëbe mae hap deisu guzim'ira, emsa lalak tasik gwibik– sap timni, angna, hen enhona, enho kles gwesin srëmkam ekakim lowehe gwek, hëndep Bian Yesus Kristus Zën de lwahal zannak de zau'uk. ²⁴ Alap kirekam sa emsa lalak tasibiri, sap Zen taïblißlan tanganna. Zep zëno nësa de gu-gubiridan ola desa tïngan sa nëp sul sone gwizimdi.^w

²⁵ Aya-wal oso-wal, Biansa de abe ta gwenkam asa mas eibirida gwek. ²⁶ Men kirekam Kristen zini ëgwë gwenan, ansa de baca gulsun hyanak emki kwasang naban enaka tahasa golëtowaran. ²⁷ Ëe Bian mo nwenakë emsa gubirida'an: Suratna ansa tïngare Kristen bose wal ukip baca ulzimk.

²⁸ Bian Yesus Kristus mo kwasang-kwasangna dikire ebon mae onak lwa gwek!

^s5:16 Plp 4:4 ^t5:19 Ef 4:30 ^u5:20 1Kor 14

^v5:21 1Yoh 4:1 ^w5:24 Plp 1:6, 2Tes 3:3